



TARIKH	1.12.2013	MUKASURAT	13
HARI	AYAT	RUANGAN	DALAM NEGERI

JBPM turut serta bina rumah mangsa kebakaran

Oleh **ABDUL RAZAK DIN**

JABATAN Bomba dan Penyelamat Malaysia (JBPM), salah sebuah agensi di bawah Kementerian Kesejahteraan Bandar, Perumahan dan Kerajaan Tempatan (KPKT) berkeyakinan mampu membina lebih banyak kediaman menerusi program pembinaan semula rumah terbakar melalui inisiatif Strategi Lautan Biru Kebangsaan (NBOS), subsektor *My Beautiful Neighbourhood* (MyBN) sekiranya terus menerima sumbangan daripada pelbagai pihak menerusi Tabung Amanah KPKT.

Hanya linangan air mata sahaja yang dapat menggambarkan betapa gembiranya salah seorang mangsa kebakaran apabila akhirnya dapat menjejakkan semula kaki ke rumah baharunya yang telah dibina semula oleh anggota Bomba di bawah inisiatif NBOS.

"Saya tidak tahu berapa lama lagi dapat hidup tetapi sekurang-kurangnya saya dapat menghabiskan sisa hidup ini bersama isteri dan keluarga di dalam keadaan agak selesa.

"Pembinaan rumah baharu ini juga menunjukkan masih ada pihak yang prihatin dan sumbangan ihsan daripada BOMBA ini saya anggap sebagai hadiah hari jadi saya." Kata **Jailani Ahmad**, 90, salah seorang mangsa kejadian kebakaran di Kampung Bukit Cherakah, Kuala Selangor.

Bagi mangsa kebakaran yang sudah memasuki usia emas itu, sudah tentu dengan tulang empat keratnya dia sudah tentu tidak berdaya untuk mendapatkan sebuah rumah baharu itu setelah rumah asalnya musnah dalam kebakaran.

Sehubungan itu, Jailani mengucapkan jutaan terima kasih kepada BOMBA kerana membina semula rumahnya dan sama sekali tidak menyangka rumahnya turut terpilih untuk dibangunkan semula setelah hampir 80 peratus rumah asalnya musnah terbakar.

Sementara itu, salah seorang mangsa kebakaran di Kampung Paya Salak, Melaka, **Gilbert Tessensoen**, 53, berkata, jika diikutkan pendapatannya, beliau pastinya tidak mampu untuk membina sendiri rumahnya yang turut hangus terbakar.

"Kalau hendak ikutkan pendapatan sekarang, saya memang tidak mampu. Tetapi kita terpilih untuk terima bantuan.

"Kesemua rumah dibina sendiri oleh anggota Bomba dalam tempoh masa antara tujuh hari hingga 16 minggu dan membabitkan kos yang minimum melalui sumbangan ihsan daripada pelbagai pihak," katanya.

Dalam pada itu, Ketua Setiausaha Kementerian Kesejahteraan Bandar, Perumahan dan Kerajaan Tempatan, **Datuk Seri Arpah Abdul Razak**, berkata, sumbangan sama ada dalam bentuk wang ringgit, bahan binaan serta perabot dari syarikat swasta serta orang perseorangan amatlah diperlukan.

Ini kerana katanya, bantuan seumpamanya penting bagi memastikan program ini dapat terus dijalankan secara berterusan dan berjaya, seterusnya dapat dikembangkan lagi ke kawasan-kawasan lain pula di seluruh negara," jelasnya.

Melalui pelaksanaan inisiatif MyBN, rumah-rumah mangsa bencana seperti kebakaran akan dibantu untuk dibina semula. Pemilihan dan penilaian kategori jenis kebakaran hanya melibatkan rumah separa kekal dan bergantung kepada beberapa kriteria seperti :-

- Rumah tersebut adalah hak milik sebenar penghuni rumah
- Pembinaan rumah di atas tanah milik persendirian iaitu milik penghuni rumah itu sendiri
- Penerima berpendapatan rendah atau kurang mampu
- Terdiri daripada warga tua, ibu tunggal, bapa tunggal atau warga tunggal, serta kurang pendapatan
- Kegagalan mendapat peruntukan atau bantuan daripada mana-mana penderma, Ahli Parlimen, Ahli Dewan Undangan Negeri atau orang perseorangan.

Dalam pada itu, perkembangan dalam skop perkhidmatan yang dilaksanakan oleh Jabatan Bomba juga amat menarik sekali, di mana bermula pada tahun 1883 dengan penubuhan Bomba Sukarela Negeri Selangor yang diketuai oleh H.F Bellamy bersama-sama 15 anggota.

Pasukan ini yang diletakkan di bawah Lembaga Kebersihan telah menjadi

Pasukan Bomba dan Penyelamat Tetap pada tahun 1895.

TARIKH	1.12.2013	MUKASURAT	13
HARI	AHAD	RUANGAN	DALAM NEGERI

Pada 8 Januari 1997, Jemaah Menteri telah bersetuju perubahan nama Jabatan Perkhidmatan Bomba Malaysia kepada Jabatan Bomba dan Penyelamat, Malaysia di mana pada 21 Februari 1997, Perdana Menteri Malaysia dengan rasminya telah mengumumkan dan melancarkan pertukaran nama, logo dan bendera JBPM di Genting Highlands.

Secara umumnya, masyarakat melihat tugas dan peranan JBPM adalah terlibat di dalam insiden memadam kebakaran dan menyelamat tetapi melalui program NBOS:Kejiranan Indah, jabatan ini telah terlibat secara langsung di dalam aktiviti kemasyarakatan dengan membina semula rumah mangsa kebakaran dan golongan miskin berdasarkan kriteria tertentu.

Peranan yang baharu dalam kalangan pegawai dan anggota bomba menunjukkan warga jabatan sentiasa bersedia bergerak seiring dengan hasrat kerajaan untuk melakukan transformasi di dalam sektor awam yang menjurus ke arah memberi perkhidmatan yang terbaik kepada rakyat.

Anggota Bomba telah mencatat sejarah baharu dalam sektor industri pembinaan dengan berjaya menyiapkan pembinaan semula rumah mangsa kebakaran di Kg. Potong Pinang, Pokok Assam, Taiping, Perak dalam tempoh masa 25 hari.

Selain itu, rumah mangsa kebakaran di Kampung Nail, Kuala Besut, Terengganu telah berjaya disiapkan dalam masa tujuh hari dengan menggunakan teknologi sistem pembinaan industri (*Industrialised Building System* atau IBS).

NBOS adalah satu lagi inisiatif kerajaan bagi memacu Negara ini ke arah sebuah negara membangun, berpendapatan tinggi, harmoni dan sejahtera dalam semua aspek.

NBOS merupakan usaha kerajaan untuk meningkatkan sistem penyampaian kepada rakyat melalui inovasi yang di luar kebiasaan, idea-idea yang kreatif melalui kesepakatan antara pelbagai kementerian, jabatan atau agensi persekutuan, Negeri dan pihak berkuasa tempatan (PBT) serta pihak swasta.

Program dan projek di bawah NBOS hendaklah menepati ciri-ciri seperti memberi impak yang tinggi, dilaksanakan dalam jangka masa yang singkat dan dengan kos yang minima.

Usaha pemerkasaan penyampaian perkhidmatan awam terutamanya dalam menyediakan perkhidmatan yang mempunyai titik sentuhan langsung dengan rakyat menjadi agenda utama Kerajaan selaras dengan gagasan '1Malaysia, Rakyat Didahulukan, Pencapaian Diutamakan'.

Pada tahun 2012 sehingga 2013, 25 buah rumah mangsa kebakaran yang berpendapatan rendah berjaya disiapkan dalam tempoh masa yang singkat dengan kos lebih kurang RM33,000 sehingga RM37,000 di Semenanjung Malaysia dan RM47,000 di Sabah dan Sarawak.

Sementara itu, Tabung Amanah KPKT yang khusus untuk menerima sumbangan daripada pelbagai pihak telah diluluskan oleh Kementerian Kewangan. Melalui tabung tersebut pelbagai program bantuan dan kemasyarakatan akan dikembangkan dan diperkukuhkan lagi.

Senarai rumah yang disiapkan oleh Jabatan Bomba dan Penyelamat

1. Kg. Bukit Cherakah, Kuala Selangor, Selangor
2. Kg. Gadok Sawah, Gemencheh, Negeri Sembilan
3. Kg. Tanjung Medan, Parit Perak
4. Kg. Masjid Lama, Alor Setar, Kedah
5. Kg. Besut, Kemaman Terengganu.
6. Kg. Nail, Besut, Terengganu
7. Kg. Potong Pinang, Pokok Assam, Taiping, Perak
8. Kg. Baru Batu 16, Sungai Sumun, Bagan Datoh, Perak
9. Jalan Parit 4, Sekinchan, Selangor
10. Jalan Ulu Gadong 1, Kg. Ulu Gadong, Kota, Negeri Sembilan
11. Kg. Baru Ayer Salak, Melaka
12. Kg. Paya Salak Bukit Berlian, Paya Rumpit, Melaka
13. Kg. Padang Lalang, Segamat, Johor
14. Parit Nipah Darat, Parit Raja, Batu Pahat, Johor
15. Jalan Kaki Bukit, Kangar, Perlis
16. Kg. Belukar, Belakang SMK Changlun, Kedah
17. Kg. Baru Gunung Senyum, Temerloh, Pahang
18. Kg. Paya Berenjut, Kemaman Terengganu
19. Kg. Cita Jaya, Tanah Merah, Kelantan
20. Kg. Lubok Stoi, Rantau Panjang, Kelantan
21. Kg. Kilan Pulau Akar W. Persekutuan Labuan
22. Kg. Kopunadan, Matunggong Kudat, Sabah
23. Kg. Kelanahan Rimba, Papar Sabah
24. Kg. Buntal Ulu, Kampung Buntal, Kuching, Sarawak
25. Kg. Jeriah Abang Ramli Batu 7 1/2, Sibu, Sarawak

Sebahagian besar sumbangan diperolehi menerusi pelbagai agensi seperti Kementerian Kemajuan Luar Bandar dan Wilayah (KKLW), Majlis Agama Islam Perak, Tabung Darul Iman Terengganu, Baitulmal Sarawak, TNB, IRIS Corporation Berhad, REHDA, yayasan dan pemaju untuk membina semula rumah mangsa kebakaran yang miskin tegar.

Mana-mana pihak yang ingin memberi sumbangan, dialu-alukan mengemukakan kepada Ketua Setiausaha Kementerian Kesejahteraan Bandar, Perumahan dan Kerajaan Tempatan.

TARIKH	1.12.2013	MUKASURAT	13
HARI	AHAD	RUANGAN	DALAM NEGERI



ABDUL Rahman Dahlan (tengah) bersama-sama sebahagian anggota dan pegawai Bomba ketika hadir pada Majlis Penyerahan Kunci Rumah yang siap dibina oleh JBPM di Kampung Nail, Kuala Besut, Terengganu.



MENTERI Kesejahteraan Bandar, Perumahan dan Kerajaan Tempatan, Datuk Abdul Rahman Dahlan (tengah) bertanya sesuatu kepada salah seorang pegawai Bomba yang terlibat dalam pembinaan semula rumah mangsa kebakaran.